

Vanq Cehsigloux Haeuj Sim Gyoengq Nyez Bae

□ Vuz Hungzli/吴鸿丽

Bouxcoz nyezrauh dwg gyoengqvunz dawz rap youqgaenj couqmaenh gij eiqsik Cunghvaz Minzczu ranz vunz ndeu, couqmaenh gij eiqsik Cunghvaz Minzczu ranz vunz ndeu dwg gij hong youqgaenj seizdaih moq hagdangz guh hong minzczu doxgiet baenaj son’gyauq. Gaenh bi daeuj, dou doenggvaq swhsiengj son’gyauq、vwnzva cimqnyinh、hozdung dapdaiz, haenqrengz guh ndei hong son’gyauq couqmaenh gij eiqsik Cunghvaz Minzczu ranz vunz ndeu, mboujduenh fungfouq minzczu doxgiet baenaj hamzeiq, cienzmienh daezsang hagdangz gyauyuz gyauyoz caetliengh. Hagdangz gonqlaeng aeu ndaej swcigih minzczu doxgiet baenaj mozfan cizdij、daengx guek minzczu doxgiet baenaj mozfan cizdij daengj 30 lai hangh mingzdaeuz ndei.

Swhsiengj son’gyauq comz sim vunz. Hagdangz doenggvaq “vwnzva、vanzging、gocwngz、hozdung” seiq cungj son’gyauq fuengfap neix, doidoengh couqmaenh gij eiqsik Cunghvaz Minzczu ranz vunz ndeu haeuj hagdangz、haeuj godangz、haeuj ukgyaeuj. Lai leihyung hahag caeuq bizyez denlij、banhoih doihhoih hozdung、faqciengz vwnzva daengj daeuj guh son’gyauq, hawj daengx hagdangz lauxsae hagseng cungj laeb gij leixniemh “seiq aen caezcaemh”, mboujduenh demhaenq “haj aen nyinhdoengz”. Ingbaengh gij gyaucaiz dungjbien haenx, moix singhgiz haibanh lauxsae hagseng gyangjco、sedonz saw veh minzczu gocwngz gungh 23 monz, dawz couqmaenh gij eiqsik Cunghvaz

Minzczu ranz vunz ndeu cienzmienh yungz haeuj gocwngz dijhi bae laebguh. Dinghgeiz haibanh minzczu vwnzva yenzyoz bozvuzgvanej gocwngz、feihyiz gocwngz daengj, hawj daengxgyoengq lauxsae hagseng cungj cienzswnj minzczu vwnzva ndeiraeuh. Hailaeb ciengqheiq haeuj hagdangz、cietndaemndai、ciet minzczu dijyuz daengj gocwngz, hawj son’gyauq couqmaenh gij eiqsik Cunghvaz Minzczu ranz vunz ndeu engq miz yaugoj.

Vwnzva cimqnyinh demlai nyinhdoengz. Hagdangz dawz minzczu doxgiet baenaj son’gyauq caeuq cienzswnj fathoengh Cunghvaz conzdungj vwnzva maenhndei dox giethab, doenggvaq ciengq gij go minzczu doxgiet ndei、gangj gij gojgaeq minzczu doxgiet baenaj ndei、veh gij veh minzczu doxgiet baenaj ndei daengj fuengsik, ungganq boux senhgyangjyenz iq minzczu vwnzva, hawj gij vwnzva ronghlwenq 56 aen minzczu youq ndawsim gyoengq nyez roengz rag.

Hagdangz caep gij gingj ndaw hagdangz seiz cungj yungzhab gij doxgaiq maenhndei vwnzva Cunghvaz Minzczu, gij gingj caep ndaw hagdangz haenx cungj yaenq wweizmaj youq henz, hawj hagdangz moix aen gencuz、moix giz gingj caep, cungj baenz gij gocwngz son’gyauq minzczu doxgiet baenaj.

Hozdung dapdaiz daezswng yaugoj. Hagdangz hengzguh gij hozdung daegsaek son’gyauq ndiepgyaez gya guek、cienzswnj vwnzva maenhndei、ganqbaenz laexsoq Cunghvaz daengj, coicaenh dwz

ci dij mejj lau haj yiengh caezcaemh son、cienzmienh fazcanj. Youq ngoenzciet conzdungj Cunghvaz caeuq ngoenzciet minzczu, moix bi guh boux cienzswnj feihyiz iq ciengj aeu “naed baiz vasigloux” hozdung、sevei sizcen daejniemh yenzyoz hozdung daengj, guhbaenz “yungz • comz • ron z • doeng” diuz roenloh guh son’gyauq neix. Yawjnaek guh aen giva gak cuz bouxcoz nyezrauh gyaulouz, caeuq ndaw gih rog gih 13 aen hagdangz gietbaenz hagdangz caemhguh, lauxsae hagseng dox baedauq gyaulouz.

Mienhyiengh Dunghmungz gyagiengz gyaulouz. Hagdangz yawjnaek caeuq Dunghmungz、Gangj Au Daiz digih guh gij hozdung bouxcoz nyezrauh minzczu doxgiet baenaj dox baedauq dox gyaulouz lai cungj lai yiengh haenx. Camgya Cungguk——Dunghmungz Feihvuzciz Vwnzva Yizcanjcouh hozdung, dawz “duzlingz gvai、raed ceij、cizveh” daengj conzdungj vwnzva ndeiraeuh Cunghvaz faen loih faen buek bae langhbaij; cujciz lauxsae hagseng hagdangz “Gij Gvai Gvangjsih” daengj minzczu yisuzdonz bae Yanghgangj、Aumwnz digih caeuq Sinhgyahboh daengj guekgya guh vwnzva gyaulouz, gaenxmaenx cienzboq Cunghvaz Minzczu vwnzva. Caeuq Daizvanh guh bouxcoz nyezrauh cuzgiuz gyaulouz, baijok gij yienghndei Cunghvaz Minzczu ranz vunz ndeu.

(Bien neix sien daeng youq 《Gvangjsih Yizbau》, bouxraiz dwg Nanzingz Si Sinhhingh Minzczu Zozyau yaucangj)

Iwnh mbangj sawgeq cihsaw minzczu vunz noix Gvangjsih

Sawgeq Sawndip Bouxcuengh

□ Vangz Gyanghmyauz hoiz



▲ Banj Sawndip bonjsaw 《Sae Youz Geiq》.

Cib’ it、Banj Sawndip 《Sae Youz Geiq》

Mbouj faen gienj, cek ndeu, 40 yieb. Mbouj rox coh bouxsij, Cinghgvanghsi cibhaj bi (1889 nienz) caubonj. Ceijsa, cangbwn, Sawndip causij, sawmaeg. Ceksaw sang 20.5 lizmij, gvangq 15.5 lizmij, moix buenq yieb baiz ndeu, moix baiz 16 cih saw. Bonj saw neix youq 1987 nienz daj Gvangjsih Laizbinh Si Hinghbinh Gih soucomz, seizneix yo youq Gvangjsih Bouxcuengh Swcigih Saujsu Minzczu Gujciz Baujhu Yenzgiu Cinghsinh.

《Sae Youz Geiq》dwg Cungguk gujdenj seiq bonj saw mizmingz ndawde bonj ndeu, dwg sawcuenh fangzbaed bienraez Cungguk ciuhgonq bouh daih’ it langman cujyi youz Mingzdai siujsozgyah Vuz

Cwngzwnh biensij. 《Sae Youz Geiq》cujyau sij gij goj Dangzcauz Daicungh Cinhgvanh seiz Sunh Vugungh、Cuhbazgai、Sahswnggh、Maxlungzhau seiq boux baujhoh Dangzswnggh bae baihsae aeu sawging, gwnz roen ginglig hojnanh, itloh dwk iugvaiq duzfangz, gaijgez saeh yiemj, doeklaeng bae daengz baihsae, aeundaej sawging.

《Sae Youz Geiq》banj Sawndip, hix miz vunz heuhguh 《Dangzswnggh Aeu Sawging》《Saw Dangzvuengz》daengj, dwg sawging goengsae Bouxcuengh guh yizsiz ndawbiengz ciengqdoeg yungh. Goengsae Bouxcuengh guh yizsiz, bouhloh haemq fukcab, gaengawq neiyungz mbouj doengz ciengz hung ciengz iq mbouj doengz, ciengz iq guh yizsiz buenq ngoenz, ciengz hung guh yizsiz

baenz sam hwnz sam ngoenz, engqlij lai nanz dem. Vihliux ciuyinx bouxyawj, hix vihliux siucawz guh hong nanz baegnaiq, goengsae ciengzseiz guh yizsiz caeuq guh’ angq dox gyauca hawj vunzlai soengsim. Gij hingzsiak guh’ angq ciengzseiz dwg guhfwen、gangjriu、gangjgoj daengj, loih neiyungz guh’ angq neix baudaengz gojfangz cienzgangj、minzczu lizsij、swnghecanj cihsiz、lunzlij daudwz, guhdaengz gij muzdiz cienzswnj vwnzmingz caeuq vunz baed caez angq.

《Sae Youz Geiq》banj Sawndip caeuq 《Sae Youz Geiq》banj Sawgun cengca haemq hung. Daih’ it dwg neiyungz caezcingj fuengmienh, bonj Sawndip aenvih dwg yawj ciengzdieg aeuyungh, cij genjaeu mbangj gojgaeq, daengz Dangzswnggh sou Cuhbazgai couh sat, beij bonj Sawgun noix haujlai neiyungz caeuq gojgaeq, gangjok ciengqgangj seizgan mbouj nanz. Daihngleih dwg miuzsij vunz caeuq gangj gij saeh haenx mbouj doxdoengz. Bonj Sawndip coenz vah yungh caet cih dawzyinh, gangjgouz dawzyinh, doeg bae raeuzrwd, hab gij sibgvenq Bouxcuengh bak gangj, hix engq yungzheih boih ciengq. Hoeng aenvih dwg caet cih dawzyinh, daengx bien faenzcieng mbouj faen ciengciet, doiq bouxvunz miuzsij caeuq gangj gojgaej beij bonj Sawgun noix haujlai, dandan dwg dwen daengz cix sat. Sam dwg bonj Sawndip yungz haeuj gij cau hguh gwndaenj caeuq fungsug sibgvenq dieg

Bouxcuengh, gangjok bonj Sawndip doiq bonj Sawgun guh gajcauh caeuq hwnghat. Lumjbaenz, ndaw saw sij Dangzswnggh mbouj rox gij banhfap aeu sawging yiengq gak bouxhak gouzson seiz “aeu binhlangz guh laex”. Cungj laex neix dwg gij fungsug Mingz Cingh daengz Minzgoz seizgeiz dieg baihnanz gag miz, riuzcienz youq Gvangjsih、Gvangjdungh、Haijnanz、Daizvanh、Fuzgen doengh gij dieg neix, youq dieg Dunghnanzya hix hwngh baenzneix guh. “Aeu binhlangz guh laex” oklaeng gij fungsug bak nyaij binhlangz, dwg gij fungsug ciuhgonq gij vunz ciuhgonq Cuengh Dung, raen sij youq ndaw saw lizsij Handai, cienz bae gyaenan. Aenvih binhlangz miz gij goeng’ yauq siucwk、gaj non、siu heiq、hengzraemx daengj, ndaej nyinhnaeuz dwg cungj huq gviq、noix miz、mizyungh ndeu, vihneix vunzlai yawj binhlangz baenz gij doxgaiq youqgaenj miz eiqngeih, ndaej gvangqlangh yungh youq daih hek、gietvaen、dajcaeq daengj gak cungj ciengzhab, guhbaenz gij fungsug sibgvenq “aeu binhlangz guh laex” baihnanz gag miz haenx.

Gyonj daeuj gangj, 《Sae Youz Geiq》banj Sawndip oklaeng saw mizmingz ciuhgonq Cungguk 《Sae Youz Geiq》, hoeng de mbouj ciuq buen cigciep hoiz, cix dwg guh gyagoeng lingh cau, “gij daegdiemj Bouxcuengh” noengznwd, dwg gij cwngzgoj youqgaenj Cuengh Gun vwnzva gyaulouz yungzhab.